

Ni Pangulong  
Henry B. Eyring

Unang Manuglaygay  
sa Unang Panguluhan



# Pamilya kag mga Abyan sa Katubtuban

Kon sa diin man kamo nagapuyo, may mga abyán kamo nga nagapangita sing mas dako nga kalipayan nga inyo nasalapoan sa pagpangabuhi sang ginpanumbalik nga ebanghelyo ni Jesucristo. Indi man nila malaragway ining kalipayan sa hambal, apang mahibal-an nila ini kon makita nila ini sa inyo kabuhi. Magatinguha sila nga mahibal-an ang ginahalinan sinang kalipayan, ilabi na kon makita nila nga nagapangatubang man kamo sang mga pagtilaw pareho sa ila.

Nabatyagan ninyo ang kalipayan samtang ginatumani ninyo ang mga kasuguan sang Dios. Amo ina ang ginpromisa nga bunga sang pagpangabuhi sang ebanghelyo (tan-awa sa Mosias 2:41). Wala kamo nagatuman sing tampad sang mga kasuguan sang Ginuo agud makita sang iban nga tawo, pero inang nakakita sang inyo kalipayan ginahanda sang Ginuo sa pagpamati sang maayong balita sang Pagpanumbalik sang ebanghelyo.

Ang mga bugay nga ginhatac sa inyo nagtuga sang mga obligasyon kag manami nga mga oportunidad para sa inyo. Bilang may kasugtanang nga disipulo ni Jesucristo, obligado kamo nga magtanyag sa iban sang oportunidad nga makasalapo sang dugang nga kalipayan, ilabi na sa inyo mga abyán kag mga miyembro sang inyo pamilya.

Nakita sang Ginuo ang inyo oportunidad kag ginlarragway ang inyo obligasyon paagi sa sining kasuguan:

“Kinahanglanon sa tagsa ka tawo nga ginpaandaman nga magpaandam sa iya isigkatawo” (tan-awa sa D&C 88:81).

Ginapahapos pa gid sang Ginuo nga sundon inang kasuguan paagi sa pagbag-o nga nagakatabo sa inyo tagipusuon sa inyo pagbaton kag pagpangabuhi sang ebanghelyo ni Jesucristo. Bilang resulta, ang inyo gugma para sa iban nagatubo, amo man ang inyo handum para sa ila nga makasalapo sang amo man nga kalipayan nga inyo naeskperiyensyan.

Isa ka halimbawa sinang pagbag-o amo ang kon paano ninyo ginabaton ang kahigayunan nga makabulig sa pangmisyonaryo nga buluhaton sang Ginuo. Madali nga mahibal-an sang full-time nga mga misyonero nga makapaabot sila gikan sa isa ka matuod-tuod nga hinaylo ukon convert sang bulig kon magpangayo sang matudloan ukon referral. Nagahandum ang isa ka hinaylo nga ang iya mga abyán kag mga miyembro sang pamilya malipay man.

Kon ang inyo ward mission leader ukon mga misyonero magpangayo sang ngalan sang mga tawo nga tuludloan, isa ini ka dako nga pasidungog sa inyo. Nakahibalo sila nga nakita sang mga abyán ninyo nga malipayon kamo kag, gani, inang mga abyán ginhanda agud mamati kag magpili nga batunon ang ebanghelyo. Kag may pagsalig sila nga kamo ang mangin abyán nga

ila kinahanglanon sa ila pagsulod sa ginharian.

Indi kamo dapat mahadlok nga mawad-an sang mga abyán sa pag-agda sa mga misyonero nga magbisita sa ila. May mga abyán ako nga nagsikway sang mga misyonero apang ginpasalamatán ako sa malawig nga tinuig sa pagtanyag sa ila sang isa ka butang nga nahibal-an nila nga tuman ka importante sa akon. Sarang ninyo himuong ang mga pag-abyanay sa katubtuban paagi sa pagtanyag sang ebanghelyo, nga makita nila nga nagdala sa inyo sang kalipayan. Indi gid pagpaligara ang oportunidad nga agdahon ang isa ka abyán kag ilabi na ang isa ka miyembro sang pamilya sa pagpili nga sundon ang plano sang kalipayan.

Wala na sing mas dako pa nga oportunidad para sa sinang pagpangagda sangsa sa mga templo sang Simbahan. Didto ang Ginuo makatanyag sang mga ordinansa sang kaluwasan sa aton mga minatay nga wala nakabaton sini sang buhi pa sila. Nagatan-aw sila sa inyo (gikan sa kalibutan sang mga espiritu) nga may pagpalangga kag paglaum. Ang Ginuo nagpromisa nga makaangkon sila sang oportunidad nga magkari sa Iya ginharian (tan-awa sa D&C 137:7–8), kag Iya gintanom ang gugma para sa ila sa inyo tagipusuon.

Madamo sa inyo ang nakabatyag sang kalipay sa pagtanyag sang mga ordinansa sang templo sa iban, pareho man nga nalipay kamo kon nagahatag kamo sang ngalan sang mga tawo sa mga misyonero agud bisitahan. Nakabatyag kamo sang mas dako pa gid nga kalipay sa paghikot sang mga ordinansa para sa inyo mga minatay. Ginbahayag sa Propetang si Joseph Smith nga ang aton wala'y katapusán nga kalipayan posible lamang kon itanyag naton ang alagyan padulong sa sinang pagpamaayo sa aton mga minatay paagi sa pag-proxy sa ila sa mga ordinansa sang templo (tan-awa sa D&C 128:18).

Ang tion sang Paskua nagaliso sang aton mga tagipusuon sa Manluluwas kag sa kalipay nga dala sang Iya ebanghelyo sa aton. Ginapakita naton ang aton kapasalamatán sa Iya sa pinakamaayo nga paagi kon ginatan-yan ng naton inang kalipayan sa iban. Ang kapasalamatán nagahimo nga kalipayan kon maghatag kita sang mga ngalan sa mga misyonero kag kon magdala kita sang ngalan sang aton mga minatay sa templo. Ang ina nga

ebidensya sang aton kapasalamatán sarang maghimo sang mga abyán kag mga pamilya nga nagapadayon sa katubtuban.

## PAGTUDLO GIKAN SA SINING MENSAHE

Si President Eyring nagapaathag nga makapakita kita sang aton kapasalamatán sa Manluluwas paagi sa pagpaambit sang ebanghelyo sa iban. Sarang ninyo hambalan upod sinang inyo ginatudloan kon paano ang dulot sang ebanghelyo nagbugay sang ila kabuhi. Hunahunaa ang pag-agda sa ila nga kilalahon sing mai-nampuon, inang luyag nila paambitan sang regalo sang ebanghelyo kag kon paano nila himuong ini.

## MGA KABATAAN

### Magpaambit sang Inyo Panaksihon

Sarang kamo magpaambit sang regalo sang ebanghelyo sini nga Paskua paagi sa paghatag sa isa ka abyán ukon kaingod sang kopya sang Libro ni Mormon upod ang panaksihon ninyo nga nakasulat sa sulod. Sunda ining mga tikang agud mahanda ninyo ini:

1. Sa isa ka panid sang papel, magtakos sang isa ka rectangle nga mga  $4\frac{1}{2} \times 6\frac{1}{2}$  ka pulgada ( $11\frac{1}{2} \times 16\frac{1}{2}$  cm) kag magpabulig sa isa ka hamtong sa paggutting sini.
2. Ibutang ang inyo larawan—pwede drawing ukon letrato—sa ibabaw sang pahina.
3. Isulat ang inyo panaksihon sa idalom sang inyo larawan.
4. Magpabulig sa isa ka hamtong sa pag-angot sang papel sa sulod nga takop sang Libro ni Mormon.

## LAMHARON

### Pwede Bala Ako Magpaambit sang Libro ni Mormon?

Ni Josh Arnett

Sang una ko pa lang nga tuig sa high school, ang akon seminary teacher nag-agda sa amon klase nga

maghatag sang mga kopya sang Libro ni Mormon sa mga abyan namon nga indi miyembro sang Simbahan. Bisan kahuluyaon gid kaayo sa akon, ginbaton ko ang pangagda.

May pila man ka adlaw nga gintipon ko ang akon kaisog, pero sang ulihi ginhataq ko sa akon abyan nga si Britny ang libro sang tig-palanyaga kag nagpaambit ako sang malip-ot nga panaksihon. Ginpasalamatangako ni Britny para sa libro.

Sa katapusan sinang school year, nagbalhin esku-welahan si Britny pero padayon kami nga nagakontakanay. Ginsugiran niya ako parte sa iya bag-o nga eskuwelahan kag nga halos tanan sang iya mga abyan mga miyembro sang Simbahan, pero wala gid sia nag-istorya sang bisan ano sa akon nga parte sa Dios.

Nagbag-o ina antes ako naglakat sa misyon. Nakabaton ako sang mensahe kay Britny nga kuno may importante sia nga ibalita sa akon: bulunyagan na sia, kag luyag niya ako pasalamatangako sa pag-inabyanay namon kag sa pagpakita ko sang maayong ehemplio.

Ginpili sang Dios ang isa ka mahuluy-on nga 15-anyos nga wala sing eksperiensiya parte sa misyon kag gingiyahan ini nga magpaambit sang ebanghelyo sa isa nga nahibaloan Niya nga magabaton sini. Nakahibalo ako nga sa pagpamati sa Espiritu, tanan kita sarang makakita sang mga tawo sa aton palibot nga nagahulat nga makahibalo parte sa ginpanumbalik nga ebanghelyo. Nakahibalo ako nga kon magbulig kita nga makadala sang bisan isa lang ka tawo sa Ginuo, "ano ayhan kadako ang mangin [aton] kalipay upod sa iya sa ginharian sang [aton] Amay!" (tan-awa sa D&C 18:15).

*Ang tagsulat nagapuyo sa Washington, USA.*



Pagtuo, Pamilya, Bulig

# Ang Diosnon nga Misyon ni Jesucristo: Ang Bugtong nga Inanak

Tun-i sing mainampuon ining materyales kag hibaloa kon ano ang inyo ipaambit. Paano bala ang paghangop sang kabuhi kag misyon sang Manluluwas makadugang sang inyo pagtuo sa Iya kag makabugay sinang inyo ginaalagaran paagi sa visiting teaching? Para sa dugang nga impormasyon, mag-log on sa [reliefsociety.lds.org](http://reliefsociety.lds.org).

**K**abahin ini sang serye sang Mga Mensahe sa Visiting Teaching nga nagalakip sang mga aspeto sang misyon sang Manluluwas.

Ang aton Manluluwas nga si Jesucristo, ginatawag nga Bugtong nga Inanak bangod Sia lamang ang tawo sa duta nga nabun-ag sa mortal nga iloy kag imortal nga Amay. Iya ginpanubli ang diosnon nga mga gahum gikan sa Dios, Iya Amay. Gikan sa Iya iloy nga si Maria, Iya napanubli ang mortalidad kag kinahanglan Niya magbatas sang kagutom, kauhaw, kakapoy, kasakit, kag kamatayon.<sup>1</sup>

Bangod si Jesucristo ang Bugtong nga Inanak sang Amay, sarang Niya ihalad ang Iya kabuhi kag mabanhaw. Ang balaan nga mga kasulatan nagatudlo nga “paagi sa pagpasag-uli ni Cristo,” kita “makaangkon sing pagkabanhaw” (Jacob 4:11). Natun-an man naton nga ang tanan “mahimo mabanhaw sa pagkawala’y kamatayon padulong sa kabuhi nga wala’y katapusan” kon kita “magpati” (D&C 29:43).

Kon mahangpan naton sing mas lubos kon ano ang kahulugan nga si Jesus isa ka Bugtong nga Inanak sang Amay, ang aton pagtuo kay Cristo magadako. Si Elder D. Todd

Christofferson sang Quorum of the Twelve Apostles nagsiling, “Ang pagtuo kay Jesucristo amo ang mabaskog nga pagpati kag pagpasalig sang (1) Iya estado bilang ang Bugtong nga Inanak sang Dios, (2) Iya wala’y dulonan nga Pagpasag-uli ukon Atonement, kag (3) Iya literal nga Pagkabanhaw.”<sup>2</sup> Ang moderno nga mga propeta nagsaksi: “[Si Jesucristo] ang nangin . . . Bugtong nga Inanak sa unod, ang Manunubos sang kalibutan.”<sup>3</sup>

## Gikan sa Balaan nga mga Kasulatan

Juan 3:16; Doctrine and Covenants 20:21–24; Moses 5:6–9

## Gikan sa Aton Kasaysayan

Sa Bag-o nga Katipan [New Testament] mabasahan naton ang parte sa mga babayi, nga nahingadlan kag wala, nga nagpakita sang pagtuo kay Jesucristo, nagtuon kag nagpangabuhi sang Iya mga pinanudlo, kag nagsaksi sang Iya pag-alagad, mga milagro kag kahalangdon. Ining mga babayi nangin dawayon nga mga disipulo kag importante nga mga saksi sa buluhaton sang kaluwsasan.

Halimbawa, si Marta nagpaambit sang mabaskog nga panaksihon

parte sa pagkadiosnon sang Manluluwas sang sia nagsiling sa Iya, “Nagatuo ako nga ikaw ang Cristo, ang Anak sang Dios, sia nga nagakari sa kalibutan” (Juan 11:27).

Ang pila sang pinakauna nga mga saksi sa pagkadiosnon sang Manluluwas amo ang Iya iloy nga si Maria, kag iya himata nga si Elisabet. Wala madugayi pagkatapos nga ang anghel nga si Gabriel nagbisita kay Maria, ginkadto niya si Elisabet. Kag sang pagkabati ni Elisabet sang pag-abibi ni Maria, sia “napun-an sang Espiritu Santo” (Lucas 1:41) kag nagpaambit sang panaksihon nga si Maria mangin iloy sang Anak sang Dios.

## MGA TANDA

1. Tan-awa sa *Gospel Principles* (2009), 52–53.
2. D. Todd Christofferson, “Building Faith in Christ,” *Liahona*, Sept. 2012, 13.
3. “The Living Christ: The Testimony of the Apostles,” *Liahona*, Abr. 2000, 2–3.

## Ano ang Sarang Ko Mahimo?

1. Ngaa importante para sa akon nga mahangpan ang papel ni Jesucristo?
2. Paano bala madugang ang aton pagtuo kon magtipig kita sang aton mga kasugtanan?